

---

Saksnr: 2020/50456-1  
Saksbehandlar: Harald Norvald Offerdal

---

## Saksgang

Utval	Utv.saksnr.	Møtedato
Hovudutval for næring, naturressursar og innovasjon		04.06.2020
Fylkesutvalet		18.06.2020

## Dei kommunale næringsfonda si rolle og framtid i Vestland fylke.

Forslag til innstilling:

1. Det er sett av ei årleg ramme på 4 mill kroner til kommunale næringsfond i økonomiplanperioden 2021-2024. Ei ytterlegare finansiering ut over dette, må avklarast i den vidare budsjettprosessen.
2. Fylkesrådmannen blir beden om å legge fram ei sak om korleis ein skal organisere ei ordning med kommunale næringsfond i Vestland fylke i løpet av hausten 2020

## Samandrag

Denne saka er ei oppfølging av vedtak i sak 20/2020, 16.04.2020, der Hovudutval for næring, naturressursar og innovasjon ba administrasjonen kome attende med ei sak der ein drøftar dei kommunale næringsfonda si rolle og framtid i Vestland fylke.

Fylkestinget vedtok i sitt budsjett for 2020 å sette av 4 millionar kroner til kommunale næringsfond i Sogn og Fjordane. Denne saka drøftar ikkje budsjettmessig avsetnad til kommunale næringsfond, ut over å belyse ulike modellar for kva oppretting av ei ordning for Vestland fylke vil innebere av økonomi ut frå ulike satsar pr. tildelt kommune. Ut frå at Vestland fylke har starta budsjettarbeidet for 2021, vil det være opp til Finasutvalet å vurdere i budsjettprosess om det skal setjast av midlar til kommunale næringsfond i 2021. Ut over dei 4 millionane som ligg i budsjett 2020, vurdere administrasjonen at der ikkje er rom i eksisterande ramme for å auke denne posten. Om ynskjeleg kan administrasjonen legge fram ei sak om korleis ein skal organisere ei ordning med kommunale næringsfond i løpet av hausten 2020.

Rune Haugsdal  
fylkesrådmann

Bård Sandal  
fylkesdirektør

*Saksframlegget er godkjent elektronisk og har difor inga handskriven underskrift*

Vedlegg:

1. Konesjonsavgifter 2019 Hordaland
2. Konesjonsavgifter 2019 Sogn og Fjordane
3. Oversikt kommunar innanfor det distriktpolitiske verkeområdet Hordaland og Sogn og Fjordane
4. Innspeil frå Sunnfjord kommune

## Saksutgreiing

Dei kommunale næringsfonda si rolle og framtid i Vestland fylke.

Bakgrunn

Det blir vist til følgjande politiske vedtak:.

Sak14/19 Budsjett2020/økonomiplan 2020-2023 i Fylkestinget:

*Kommunale næringsfond:*

*Løyvinga skal gå til dei kommunane i SF som tidlegare var omfatta av ordninga og som ikkje er slegne saman med andre kommunar. Fylkestinget ber rådmannen utarbeide ei sak om ny modell for tildeling i heile Vestland frå og med 2021.*

Sak 20/20 Tildeling til kommunale næringsfond 2020 i Hovudutval for næring, naturressursar og innovasjon punkt 7:

*Hovudutvalet ber administrasjonen kome attende med ei sak i vår der ein drøftar dei kommunale næringsfonda si rolle og framtid i Vestland.*

Denne saka er for det første ei oppfølging av det siste vedtaket der hovudutvalet ba administrasjonen kome attende med ei sak der ein drøftar dei kommunale næringsfonda si rolle og framtid i Vestland fylke.

Samstundes er fylkeskommunen midt oppe i ein budsjettprosess der ein må ta stilling til om det skal setjast av midlar til kommunale næringsfond i 2021.

Nærmare om ordninga med kommunale næringsfond

Kommunale næringsfond er ei fondsordning som gir kommunar midlar til lokale næringsutviklings-tiltak.


Formålet med ordninga har vore å styrke næringsutviklinga og sysselsettinga i område av landet med særlege distriktsutfordringar. Retningsliner for bruken av fonda har variert alt etter kva regjering som har gjeve tilsagn.

Grunngjevinga for å etablere ei ordning med kommunale næringsfond har vore at kommunane sjølve veit best kor «skoen trykkjer». Vidare at ordninga skulle bidra til auka lokalt engasjement innan næringsutvikling. Dette for å skape ein breiare basis for sysselsetting i den enkelte kommunen, samt skape ein tettare kontakt mellom kommunen og lokalt næringsliv.

Dette var i si tid øyremerkta statlege midlar frå staten via dei Regionale utviklingsmidlane. Fylkeskommunane har forvalta ordninga og fordelt midlane vidare til kommunane. Øyremerkinga vart etter kvart teken bort, men med statlege føringar om at fylkeskommunane likevel sette av tilstrekkeleg med midlar av dei sokalla regionale utviklingsmidlane til kommunale næringsfond. Ordninga har totalt sett kome under press etter kvart som potten til regionale utviklingsmidlar har vorte monaleg redusert dei siste åra.

Figuren under viser den samla reduksjonen i Regionale utviklingsmidlar frå staten til Hordaland og Sogn og Fjordane fylker frå 2012 til 2020. Der er slik administrasjonen vurderer det ikkje rom for å sette av ein større pott enn dei 4 millionane til Kommunale næringsfond innanfor ramma som er sett av til tiltaksmidlar i 2020 på næringsområdet.

## KMD-midlar til Vestland historisk



Det er kommunane sjølve som avgjer korleis pengane skal brukast innanfor rammene av mellom anna forvaltningslova, reglar om statsstønad, staten sitt økonomiregelverk og statlege og fylkeskommunale retningslinjer.

Ikkje alle kommunar er kvalifisert for ordninga. Kommunar som er utanfor det distriktpolitiske verkeområdet og/eller med kraftinntekter i form av konsesjonsavgifter over ein viss terskel har falle utanfor ordninga.

Distriktpolitiske verkeområde er område i ulike delar av landet med særskilde utfordringar som blir møtt med distriktpolitiske verkemiddel.

Det distriktpolitiske verkeområdet er ei geografisk avgrensing som består av tre soner - sone II, III og IV. Sone I er utanfor verkeområdet.

I sonene III og IV kan midlar brukast til distriktsretta investeringsstønad under notifiserte stønadsordningar forvalta av Innovasjon Norge.

Verkeområdet for distriktsretta investeringsstønad er eit geografisk avgrensa verkeområde som omfattar 281 kommunar (før kommunesamanslåingane). Avgrensinga er basert på utfordringar knytt til:

- Reduksjon eller ingen auke i folketallet
- Store avstandar
- Utfordringar knytt til sysselsetting, arbeidsmarknad og levekår

Når vi i denne saka snakkar om distriktpolitisk verkeområde, har vi valt å bruke verkeområdet for distriktsretta investeringsstønad som ei geografisk avgrensing. Ikkje minst fordi at dette samsvarar med Innovasjon Norge sitt verkeområde for distriktsretta investeringsstønad. Slik sett kan ein også sjå bruken av verkemidla i samanheng.

I sonene II, III, og IV kan det i tillegg nyttast midlar til kommunale grunnlagsinvesteringar som stadutvikling, vassverksutbygging og tilrettelegging for næringsverksemd.

For kraftkonsesjonar gitt etter reguleringslova eller ervervslova pliktar utbyggjar å avgje konsesjonsavgifter og konsesjonskraft til staten og berørte kommunar. Når vi i denne saka snakkar om kraftinntekter, så er dette relatert til den årlege konsesjonsavgifta utbyggjar er pålagt å betale berørte kommunar. Inntekter ved sal av konsesjonskraft blir ikkje rekna med i grunnlaget.

Arbeidsdeling fylkeskommunane og Innovasjon Norge

Dei kommunale næringsfonda fungerer i skjeringspunktet mellom kva som er fylkeskommunen og Innovasjon Norge sine næringsretta oppgåver. Difor har det vore nødvendig å klargjere denne arbeidsdelinga.

Vi siterer her frå avtalen mellom Sogn og Fjordane fylkeskommune og Innovasjon Norge:

*Kommunane skal konsentrere sitt arbeid om etablerarar og småskala næringsliv. Mindre bedrifter og personar som ikkje har eit kundeforhold til IN, bør som hovudregel ha førstekontakten mot kommunen. Bedrifter som har eit forhold til Innovasjon Norge frå før, og større etablerte bedrifter forhold seg normalt direkte til IN sitt distriktskontor. Når det gjeld bygdeutviklingsmidlane er det ei klar rolledeling mellom kommunane og IN, nedfelt i ei eiga forskrift.*

*Kommunane er normalt første kontaktpunkt i tidleg fase og ein samtalepartner for foredling og vidareutvikling av bedrifta eller etableraren sin ide. Kommunane må kunne yte praktisk bistand i oppstarts- eller planleggingsfasen. Dei minste bedriftene og entreprenørane har ei rekkje behov for tenester og service som dei bør ha tilgang til i kommunen:*

*Rådgjeving  
Nettverk  
Mobilisering  
Finansiering*

Status i Vestland fylke – ulike ordningar i dei gamle fylka

Sogn og Fjordane fylkeskommune har hatt ei ordning med kommunale næringsfond fram til fylkessamanslåinga. For 2020 er ordninga vidareført som ei mellombels ordning for kommunar i Sogn og Fjordane som ikkje er samanslegne. Fire millionar kroner er fordelt på sju kommunar.

I Hordaland har regionråda hatt partnerskapsavtalar med fylkeskommunen, sist for 2018 til 2020. Innhaldet i avtalane er knytt til rådgjeving og rettleiing for bedrifter og etablerarar, informasjon, kompetanse og finansiering for etablerarar og bedrifter. Regionråda har fått til saman 820 000 kr.; fordelt med 230 000 kr. til kvart av tre regionråd og 130 000 kr. til eitt regionråd.

Dei kommunale næringsfonda i Sogn og Fjordane og innhaldet i partnerskapsavtalane i Hordaland har i praksis hatt det same formålet. Skilnaden er at mens Sogn og Fjordane har gitt denne typen midlar direkte til kommunane, har Hordaland late desse gå via regionråda.

Vurdering etablering ordning med kommunale næringsfond i Vestland fylke

#### Kvifor ordning med næringsfond

Dei kommunale næringsfonda har for mange kommunar vore dei einaste stimuleringsmidlane ein har hatt for å bidra til lokal næringsutvikling. Fonda har hatt ei innretning som har knytt dei tett til den enkelte kommunen sin næringsstrategi. Samstundes har dei vore med på å utløyse prosjekt i og for næringslivet som elles ikkje ville blitt gjennomført. Fonda har utgjort ein tydeleg positiv skilnad for dei kommunane som har fått tilskot. Kravet om næringsapparat og formelle planar for arbeidet har vor med på å tydeleggjere og målrette arbeidet med innovasjon og næringsutvikling i kommunane.

Distriktsenteret skriv dette om kommunale og regionale næringsfond:

*«En evaluering av kommunale og regionale næringsfond viste at de kommunale næringsfondene har en særlig verdi for å styrke kommunen som pådriver for lokal nærings- og samfunnsutvikling. Evalueringen viste at de kommunale næringsfondene er av stor betydning for samspillet mellom det lokale næringslivet og kommunens førstelinje for næringsutvikling. Evalueringen viser at en velfungerende førstelinjetjeneste bidrar til å trekke til seg bedrifter og gründere som trenger hjelp til etablering eller videreutvikling av sine foretak. Flere av disse ville ellers ikke ha oppsøkt hjelp i det kommunale næringsapparatet. Kommunenes oppgaver utover det rent finansielle, som omfatter rådgivning, henvisningskompetanse og hjelp til nettverksbygging, vurderes av fondsmottakerne å være av stor betydning. Det å få midlene til å spille sammen med en velfungerende første- linjetjeneste er dermed avgjørende for å oppnå ønskede resultater ([Rambøll](#) og [Telemarksforskning 2012](#)).»*

#### Kommunale eller regionale næringsfond

Staten vurderte i si tid ved fleire høve om løyvingar til kommunale næringsfond skulle gå heilt eller delvis til interkommunale organ. Dersom ein legg forvaltninga av midlane til interkommunale

organ, kan ein stimulere til interkommunale prosjekt og regional samordning av arbeidet med innovasjon og næringsutvikling. Strategisk næringsplan for Bergensregionen er døme på slik samordning. Det å utvikle næringsvenlege regionar vil bli ei sentral utfordring for nye Vestland.

Sogn og Fjordane har stimulert til nærings samarbeid gjennom stimuleringsstilskot. Kommunane har fått to typar stimuleringsstilskot: felles fyrstelineteneste og felles næringsfond. Kvar stimuleringsstilskot har vore på kr. 100 000 (per kommune som får innvilga stimuleringsstilskot). Men ei evaluering som fylkeskommunen gjorde, synte at ein ikkje kan seie at det er stimuleringsstilskota som fører til nærings samarbeid. Det var likevel grunn til å tru at det kan ha noko verknad når tilhøva elles ligg til rette for dette.

Det som talar for å halde på ei ordning med direkte utbetaling til kommunane er mellom anna:

- Kommunane sine komparative fortrinn er nærleik - kommunane sjølve veit best kvar «skoen trykkjer». Det å få denne typen midlar til å spela saman med ei velfungerande fyrstelineteneste er ein viktig suksessfaktor for å oppnå gode resultat.
- Økonomiske verkemiddel som kommunale næringsfond vil vere til hjelp for å styrke kommunane i sitt arbeid overfor etablerarar og eksisterande næringsliv.
- Lokal nærings- og samfunnsutvikling heng saman og er gjensidig avhengig av kvarandre. Er til dømes det kommunale tenestetilbodet lite tilfredsstillande, blir det mindre attraktivt å etablere arbeidsplassar og vanskelegare å rekruttere arbeidskraft til kommunen.
- Lokal mobilisering.

#### Finansiering

Sogn og Fjordane fylkeskommune har finansiert ordninga med kommunale næringsfond frå dei regionalpolitiske utviklingsmidlane over programkategori 13.50 kapittel 550, post 64 «Inkluderande og vekstkraftige lokalsamfunn i område med særlege distriktsutfordringar». For 2020 har innretninga for programkategorien vorte endra som følgje av regionreforma. Mellom anna har dette ført til at post 64 no er innlemma i fylkeskommunane sitt rammetilskot. I framtida kan vi difor ikkje rekne med å finansiere ei ordning med kommunale næringsfond med denne typen øyremerka statlege midlar.

Vestland fylkeskommune kan såleis måtte finansiere ei framtidig ordning med kommunale næringsfond innanfor eigne budsjettammer.

Eit anna alternativ er å avskaffe ordninga med kommunale næringsfond og la Innovasjon Norge utføre oppgåver overfor bedriftene som i dag blir ivareteke av kommunane. Dette kan skje innanfor tildelte ramar eller ved at dei blir tilført ekstra midlar til dette. Det som talar imot ei slik ordning er mellom anna nærleiksprinsippet, lokal kunnskap og målsettinga om å styrke fyrstelinetenesta i kommunane.

Vel ein å bruke eigne midlar, står ein derimot friare i høve kva kriterium ein vil leggje til grunn for ei slik ordning.

#### Vurdering kriterium for tildeling midlar gitt at ein vel å bruke eigne midlar

Ikkje alle kommunar har vore kvalifisert for ordninga med kommunale næringsfond finansiert med statlege midlar. Kommunar som er utanfor det distriktpolitiske verkeområdet og/eller med kraftinntekter over ein viss terskel har falle utanfor ordninga.

Sogn og Fjordane har som sagt hatt ei ordning med kommunale næringsfond over fleire år. Heile fylket var definert innanfor det distriktpolitiske verkeområdet.

Kommunar med konsesjonsavgifter (kraftinntekter) under 2 mill. kr fekk tildelt midlar til kommunale næringsfond dersom dei oppfylte fire krav:

1. retningsliner for bruk og forvaltning av næringsfondet.
2. eit tilfredsstillande næringsapparat, der minimum ein person i 50 % stilling skal vere disponibel for oppgåver knytt til fyrstelinetenesta og kontaktinformasjon er lett tilgjengeleg for målgruppa.
3. ein strategi for næringsutvikling.
4. årsrapport.

Sogn og Fjordane fylkeskommune gjennomførte for nokre år sidan ei evaluering av ordninga. Evalueringa viste at kommunane var nøgde med fordelingskriteria slik dei var. Dei opplevde kriteria som rettvise og stabile.

Dersom Vestland fylkeskommune vel å finansiere ei ordning med kommunale næringsfond med eigne midlar, må ein gjere nokre val:

- Kommunale næringsfond har frå starten av vore eit viktig næringsretta distriktpolitisk verkemiddel.

Eit viktig regionalpolitisk perspektiv for Vestland er at heile fylket skal takast i bruk. Då må politikken i differensierast ut i frå ulike behov i ulike delar av fylket. Det er ulike rammer for verksemder og næringsmiljø og ulik tilgang på relevante samarbeidspartnarar, kunnskap og kompetent arbeidskraft. For å nå målet om å ta heile i fylket i bruk, bør ein difor tilpasse arbeidet for næringsutvikling til regionale og lokale tilhøve.

Når ein skal vurdere kriterium for tildeling av kommunale næringsfond, vil det difor vere naturleg å avgrense dette til dei distriktpolitiske verkeområda - område i fylket med særskilde utfordringar som vi mellom anna kan møte med kommunale næringsfond.

Vi har ikkje funne oppdaterte oversikter over kommunar i Vestland som kjem inn under det distriktpolitiske verkeområdet etter at kommunesamanslåingane blei sette i verk. Slik det ser ut vil ikkje samanslåingane påverke kva område i fylket som kjem inn under ordninga.

Heile gamle Sogn og Fjordane kom inn under det distriktpolitiske verkeområdet for distriktsretta investeringsstønad og 17 kommunar i gamle Hordaland. I Sogn og Fjordane har 26 kommunar blitt til 18, og dei 17 kommunane i Hordaland har blitt til 14. Samla vil 32 kommunar i Vestland vere i det distriktpolitiske verkeområdet.

- Motsett kan ein velje å sjå kommunale næringsfond som ei generell og distriktsnøytral ordning for alle dei 43 kommunane i Vestland. Dette for å styrke kommunal innovasjon og næringsutvikling.
- Ei anna viktig avgrensing for tildeling av kommunale næringsfond har vore kraftinntekter. Kommunar med inntekter av konsesjonsavgifter over ein viss terskel har falle utanfor ordninga.

Det vil vere naturleg å vidareføre dette kriteriet i Vestland fylke. Det ein kan vurdere er taket for inntekter som kvalifiserer for ordninga. Til dømes hadde Sogn og Fjordane eit tak på 2 millionar der kommunar som hadde meir enn 2 millionar i inntekt fall utanfor ordninga.

Gitt at ein set eit tak på 2 mill kr i kraftinntekter, vil berre 15 kommunar i Vestland kome inn under ordninga. Det vil seie at av 32 kommunar som kjem inn under det distriktpolitiske verkeområdet, vil 17 falle utanfor ei ordning med kommunale næringsfond på grunn av storleiken på kraftinntektene.

- Vidare bør det vere ein føresetnad for tildeling at kommunen har eit tilfredsstillande næringsapparat, eigen næringsplan/-strategi og rapporterer på bruken av midlane. Elles vil forvaltningslova sine saksbehandlingsreglar, det fylkeskommunale økonomireglementet (viss fylkeskommunale midlar), eigne retningslinjer og reglar for offentleg stønad måtte gjelde.
- Kommunale næringsfond bør som før nyttast til tiltak som fremjar næringsutviklingsarbeidet i kommunen, og då i første omgang til tilrettelegging og støtte til nyetableringar og dei minste bedriftene. Det bør også kunna nyttast til forstudie og forprosjekt, utvikling av nye forretningsområde og lokalmarknadsbaserte prosjekt i større bedrifter.

Det ein eventuelt kan mjuke opp i, er at midlane kan nyttast til lokale prosjekt som fremjar arbeidet med næringsutvikling, men ikkje er direkte bedriftsretta. Til dømes for å:

- ✓ betre og styrke lokal samhandlinga mellom næringslivet, kommunen og lokalsamfunnet og
- ✓ fremje lokal samfunnsutvikling.

Samla vurdering

Joakim Systaddal som er tenesteleiar - nærings- og samfunnsutvikling i Sogndal kommune, seier dette om kommunale næringsfond:

*Fonda har spelt ei rolle i arbeidet med å realisere dei felles strategiane og måla i næringsutviklingsarbeidet. I dette arbeidet er operative midlar viktige for å kunne bidra i viktige prosjekt, løyse ut private midlar og ta ei førande rolle i arbeidet med å skape arbeidsplassvekst, stimulere til innovasjon og bidra til utvikling i viktige næringar. Det er ikkje eit poeng at ordninga vert vidareført akkurat som før, men ein pott midlar som er avsett til tiltak som byggjer opp under dei strategiane er svært viktig for å kunne halde fram det gode arbeidet som har vore innan næringsutvikling.*

Ei ordning med kommunale næringsfond for heile Vestland bør først og fremst rettast direkte mot kommunane for oppnå mest mogleg lokale gevinstar. I høve lokalsamfunnsutvikling har Vestland lagt seg på ein strategi med å byggje lokalsamfunna «nedanfrå og opp». Dette ved hjelp av lokal mobilisering der både innbyggjarar, kommunal forvaltning, frivillige lag og organisasjonar og næringslivet må spele på lag for å lukkast. Det å stimulere til lokal næringsutvikling blir ein viktig og avgjerande del av denne mobiliseringa.

Samstundes er det behov for ei regional samordning av næringsutviklingsarbeidet. Dette for å styrke den regionale kompetansen, stimulere til interkommunale prosjekt og fremje regional samhandling. Det vil seie at ein del av den samla potten bør gå til regionråda og/eller bu- og arbeidsområde der kommunane går saman for å kunne leggje til rette for interkommunalt samarbeid på området. Vidare bør midlane til regionane øyremerkast til dette føremålet og vere søknadsbasert. Ordninga med stimuleringstilskot frå Sogn og Fjordane kan erstattast med ei slik søknadsbasert ordning. Dette mellom anna fordi ein då vil involvere heile regionar/bu- og arbeidsområde, ikkje berre to til fire enkeltkommunar.

Korleis ein vil rigge ei ordning med kommunale næringsfond må ein finne ut av. Det er ikkje tatt stilling til kor mykje pengar ein bør setje av til kommunale næringsfond, men kommunane bør ha eit visst økonomisk handlingsrom skal ordninga ha noka mening.

Nedanfor har vi prøvd å eksemplifisere to måtar å rigge ei ordning på:

- ei ordning som vil gjelde for alle kommunane. Kriterium for tildeling er ikkje vurdert i saka. Dersom ein legg seg på eit minstebeløp til kvar kommune på 250 000 kr til kvar kommune, vil det åleine utgjere 10,75 mill kr. I tillegg må det avsetjast ein sum til fordeling etter folketal.
- ei ordning der kommunar som er innanfor det distriktpolitiske verkeområdet og som har konsesjonskraftinntekter under ein gitt terskel, blir tildelt kommunale næringsfond. Med eit tak på 2 mill kr i kraftinntekter vil 15 kommunar kome inn under ordninga. I tillegg skal ein viss del av den samla summen gå til regionale samhandlingsprosjekt innan innovasjon og næringsutvikling.

Med ei samla løyving på til dømes 10 mill kroner, kan 1 mill kr setjast av til regionale prosjekt etter søknad. Sogn og Fjordane hadde ei fordeling med 60 % lik sum og 40 % etter folketal etter at stimuleringstilskota var fordelt. Gitt ei slik fordeling, vil 5,4 mill kr av 9 mill kr bli fordelt likt mellom kommunane (360 000 kr på kvar), mens 3,6 mill kr blir fordelt etter folketal.

Verknader

**Klima:** Føringar om ei berekraftig samfunnsutvikling og FN sine berekraftsmål vil også gjelde for lokal næringsutvikling.

**Folkehelse:** Tilbod om arbeid er viktig for folk si helse og livssituasjon.

**Regional planstrategi:** Ei ordning med kommunale næringsfond vil vere eit viktig verkemiddel i høve alle dei fire hovudmåla i regional planstrategi:

Mål 1 Vestland som det leiande verdiskapingsfylket og nasjonal pådrivar for eit regionalisert og desentralisert Noreg

Mål 2 Klima og miljø som premiss for samfunnsutvikling

Mål 3 Lokalsamfunn som ramme for gode kvardagsliv i heile Vestland

Mål 4 Like mogelegheiter til å delta i verdiskaping

**Økonomi:** Tiltaket har økonomiske verknader og vil påverke dei årlege budsjetta og økonomiplanen.

Vedtakskompetanse

Fylkestinget har vedtakskompetanse. Finansutvalet har det politiske ansvaret for budsjettprosessen.

Konklusjon

I saka er det gjort greie for to ulike måtar å etablere ei ordning med kommunale næringsfond i Vestland fylke:

1. ei ordning som vil gjelde alle kommunane og
2. ei ordning som vil gjelde kommunar som er innanfor det distriktspolitiske verkeområdet.

Eit tredje alternativ som også er vurdert i saka, er å avskaffe ordninga med kommunale næringsfond og la Innovasjon Norge utføre oppgåver overfor bedriftene som i dag blir ivareteke av kommunane.

Administrasjonen vil hausten 2020 kunne kome tilbake med ei sak der ein kan ta stilling til korleis ein skal rigge ei ordning med kommunale næringsfond.

Administrasjonen har i saka prøvd å eksemplifisere kostnadane med å etablere ei ordning med kommunale næringsfond for heile Vestland fylke. Eksempla gir ein viss peikepinn på kor mykje midlar som bør avsetjast til kommunale næringsfond.

Budsjettramma for økonomiplanperioden 2021-2024 er svært stram med ei førebels målsetting om ei årleg driftstilpassing på 100 mill kr. Det er førebels sett av 4 mill kroner årleg til kommunale næringsfond i økonomiplanperioden. Den tildelte ramma ligg noko under dei kostnadane som er skissert i saka.

Skal ei slik ordning ha noka meining, må kommunane få tilstrekkeleg med midlar til å utgjere ein forskjell for det lokale næringslivet - mellom anna for å kunne gi tilstrekkeleg støtte til lokale etablerarar og lokale bedrifter. I tillegg ser administrasjonen det som viktig å stimulere til regionalt samarbeid om næringsutvikling.